

Föstudaginn 19. mars 1999.

Nr. 128/1999. X

(Sigurður Eiríksson hdl.)

gegn

**Akureyrarbæ**

(Baldur Dýrfjörð hdl.)

Kærumál. Nauðungarvistun.

*Staðfest var niðurstaða héraðsdómara um að hafna kröfu X um að fellt yrði úr gildi samþykki dóms- og kirkjumálaráðuneytisins til þess að hún yrði vistuð gegn vilja sínum á sjúkrahúsi.*

### **Dómur Hæstaréttar.**

Mál þetta dæma hæstaréttardómaramir Markús Sigurbjörnsson, Arnljótur Björnsson og Gunnlaugur Claessen.

Sóknaraðili skaut málinu til Hæstaréttar með kæru 16. mars 1999, sem barst réttinum ásamt kærumálgögnum 18. sama mánaðar. Kærður er úrskurður Héraðsdóms Norðurlands eystra 16. mars 1999, þar sem hafnað var kröfu sóknaraðila um að fellt yrði úr gildi samþykki dóms- og kirkjumálaráðuneytisins 12. þessa mánaðar til þess að hún yrði vistuð gegn vilja sínum á sjúkrahúsi. Kæruheimild er í 4. mgr. 31. gr., sbr. 1. mgr. 16. gr. lögræðis laga nr. 71/1997. Sóknaraðili krefst þess að hinn kærði úrskurður verði felldur úr gildi. Hún krefst einnig kærumálskostnaðar.

Varnaraðili krefst þess að hinn kærði úrskurður verði staðfestur.

Með vísan til forsendna hins kærða úrskurðar verður hann staðfestur.

Samkvæmt 31. gr., sbr. 17. gr. lögræðis laga greiðist úr ríkissjóði þóknun skipaðs talsmanns sóknaraðila, Sigurðar Eiríkssonar héraðsdómslögmanns, vegna meðferðar málsins í héraði og fyrir Hæstarétti, en þóknunin er ákveðin í einu lagi eins og í dómsorði greinir.

### **D ó m s o r ð :**

Hinn kærði úrskurður er staðfestur.

Þóknun skipaðs talsmanns sóknaraðila, Sigurðar Eiríkssonar héraðsdómslögmanns, vegna meðferðar málsins í héraði og fyrir Hæstarétti, samtals 50.000 krónur, greiðist úr ríkissjóði.

### Úrskurður Héraðsdóms Norðurlands eystra 16. mars 1999.

Mál þetta, sem tekið var til úrskurðar í gær, er tilkomið vegna kröfu Sigurðar Eiríkssonar hdl. f.h. sóknaraðila X með vísan til 30. gr. lögræðislaga nr. 71/1997, þar sem borið er undir dóminn samþykki dóms- og kirkjumálaráðuneytisins 12. þ.m. um að sóknaraðili verði vistaður á sjúkrahúsi gegn eigin samþykki allt að 21 sólarhring.

Gerir hún þá kröfu að heimild til nauðungarvistunar og þvingaðrar lyfjagjafar verði felld niður.

Barst dóminum krafa þessi 12. þ.m. kl. 18.44.

Varnaraðili krefst þess að kröfu sóknaraðila verði hafnað.

Sóknaraðili dvelst nú á geðdeild Fjórðungssjúkrahússins á Akureyri og í kröfunni á dskj. nr. 1 segir að hún hafi í fyrstu komið sjálfviljug á sjúkrahúsið, en eftir að henni var ljóst að um nauðungarvistun var að ræða hafi hún orðið því andvíg. Hafi hún í nokkur skipti áður verið sjúklingur á geðdeild, en hún telji sig hins vegar aldrei verið haldin geðsjúkdómi.

Dóms- og kirkjumálaráðuneytið samþykkti vistun sóknaraðila 12. þ.m., sbr. dskj. nr. 2, vegna ástæðna er greinir í 2. mgr. 19. gr. lögræðislaga nr. 71/1997 og er samþykki ráðuneytisins byggt á vottorði Péturs Péturssonar heilsugæslulæknis, dags. 11. þ.m., en beiðni um nauðungarvistun samkvæmt 19. gr., sbr. 20. og 21. gr. lögræðislaga nr. 71/1997, er undirritað af Ráðgjafadeild Akureyrar 12. þ.m., sbr. dskj. nr. 8.

Í beiðninni á dskj. nr. 8 segir að sóknaraðili sé haldin ofskynjunum og sé að fá fyrirmæli að handan. Hafi hún að sögn ekki tekið lyf í mánuð, sé illa áttuð og sé ekki í neinu ástandi til að annast börn sín. Vilji hún ekki þiggja lyfjagjöf þar sem hún telji það skemma fyrir miðilshæfileikum sínum. Sé því nauðsynlegt fyrir hana og börn hennar að hún nái sem fyrst bata, en hún geri sér ekki grein fyrir ástandi sínu og er því farið á leit að hún verði lögð inn á geðdeild og fái þar þá meðferð er hún þurfi.

Í læknisvottorði Péturs Péturssonar heilsugæslulæknis til dóms- og kirkjumálaráðuneytis dags. 11. þ.m., sbr. dskj. nr. 10, segir svo um sjúkdómsferil og félagslegar aðstæður sóknaraðila, að hún hafi verið sjúk af geðklofa síðan 1996 og hafi nokkrum sinnum þurft að vistast á geðdeild FSA og hafi jafnvel komið til sviptingar vegna þess arna. Sé hún í sambúd með föður yngra barns síns, sem sé 6 ára, og eigi auk þess 10 ára gamlan son með öðrum manni. Hafi sóknaraðili ekki unnið undanfarin misseri vegna veikinda sinni, sem þó hafi tekist ágætlega að halda niðri á köflum með viðeigandi lyfjameðferð. Undanfarinn vikur hafi hún þó engin lyf tekið og hafi hún verið að sigla upp í óróleika síðustu vikuna.

Þar sem hún var ekki til samvinnu við geðlækni kvöldið áður hafi lækirinn gert sér ferð heim til hennar og hafi þar verið vel tekið.

Við skoðun læknisins á heimili sóknaraðila þann 11. þ.m. kl. 11.30 segir hann

sóknaraðila vel vakandi, en nokkuð öra og bresti mjög gjarnan í grát þegar hún skýri frá skilningsleysi fjölskyldu sinnar og heilbrigðisstétta á miðilshæfileikum sínum. Haldi hún sæmilega þræði í frásögn sinni, sem sé mjög full af ranghugmyndum um yfirnáttúrulega krafta sem að stýri henni, yfirnáttúrulega hæfileika hennar til að hafa samband við fólk í öðrum heimi og nauðgun sem hún hafi orðið fyrir af annars heims veru morguninn áður. Hafi hún farið úr jafnvægi við það og lent í árekstri í gær og sé það sannleikanum samkvæmt að hún hafi ekið bíl sínum á kyrrstæða bifreið tannlæknis hér í bæ, sem hafi haft samband við lækinn vegna annarlegs ástands sóknaraðila. Sé sóknaraðili bærilega áttuð á stað og stund, en hún hafi ekkert sjúkdómsinsnei. Hún bresti mjög auðveldlega í grát og sé mjög á ferð og flugi og sé óróleg. Sýni hún enga árársartilburði og sé vel samvinnuþýð og hafi læknum tekist að ná henni það til samvinnu að hún fylgi honum á sjúkrahús.

Í niðurstöðu læknisins segir að sóknaraðili hafi þurft innlagnar við á geðdeild FSA í apríl og september 1996 og í júlí og nóvember 1997 og hafi hún þá hlotið greininguna aðsóknargeðklofi F20.D (ICD10). Hún sé með mjög alvarlegan geðsjúkdóm og hafi nú misst allt raunveruleikaskyn og valdi aðsóknarhugmyndir henni verulegri vanlíðan. Hún hafi ekkert sjúkdómsinsnei og neiti að taka lyf þó að hún hafi samþykkt innlögn. Ljóst sé því að hún þarfnist bráðrar sérhæfðrar meðferðar á lokaðri deild, þar sem að hún sé alls ófær um að taka ákvarðanir eða bera ábyrgð á þeim og ekki sé hægt að treysta á neina samvinnu af hennar hálfu. Hætt sé við að hún geti skaðað sjálfa sig, börn sín, ellegar annað umhverfi. Mælir hann því með að gengið sé frá formsatriðum varðandi nauðungarvistun þannig að hægt sé að veita henni nauðsynlega læknismeðferð.

Í athugasemdum Sigmundar Sigfússonar, yfirlæknis geðdeilda FSA, dags. 14. þ.m., sbr. dskj. nr. 14 og 15, vegna umfjöllunar dómsins um nauðungarvistun og þvingaða lyfjagjöf sóknaraðila þá segir yfirlæknirinn að 10. þ.m. hafi heimilislæknir sóknaraðila, Pétur Pétursson, beðið vakthafandi geðlækni á FSA um mat á geðheilsu hennar og helst vistun á sjúkrahúsinu vegna gruns um að geðheilsa hennar hefði farið mjög versnandi. Á áttunda tímanum um kvöldið hafi sóknaraðili komið sjálfviljug á sjúkrahúsið í fylgd sambýlismanns síns. Eftir stutt viðtöl við hana og sambýlismanninn sitt í hvoru lagi og saman hafi verið fullljóst að veruleg versnun hafi orðið á áður þekktum geðklofasjúkdómi hennar, enda hafi sóknaraðili upplýst að hún hafi ekki tekið þau lyf sem geðlæknir hennar, Brynjólfur Ingvarsson, hafi ráðlagt til að halda sjúkdómseinkennum niðri. Hafi sóknaraðili verið í viðtali ör og spennit og sagt óðamála frá meintum miðilshæfileikum sínum og reyndi að sýna þá. Ljóst var að hún væri haldin miklum hugsanatrufnunum, ranghugmyndum og sennilega ofskynjunum. Hafi hún brugðist illa við þegar reynt var að stöðva orðaflaum hennar. Hugmyndir hennar og upplifanir um samband sitt við annan heim hafi verið svo megnar að hún hafi

talið sig þá um morguninn vaknað alblóðuga vegna nauðgunar af völdum veru sem ekki hafi verið af þessum heimi. Kvaðst hún hafa sýnt 6 ára barni sínu verksummerkin og hafi hún talið barnið einnig hafa orðið vitni að ofbeldisverkinu í sínum draumi. Þegar reynt hafi verið að fá sóknaraðila með góðu að skilja að geðdeildin gæti hjálpað henni með vistun og viðeigandi lyfjagjöf hafi hún brugðist reið við og sagst ekki vera veik. Hafi hún þó virst vera dálítið tvístífgandi í afstöðu sinni til innlagnarinnar, en geðlæknir taldi að ekkert gagn myndi vera af innlögnum nema sjúklingurinn myndi hlíta læknisráði um meðferð. Reynolds sé af því að lyfjameðferð við bráðri geðveiki hafi gagnast sóknaraðila í fyrri innlögnum hennar á geðdeild FSA, í apríl 1996, í júlí s.á. og í september og nóvember 1997. Að svo búnu hafi sóknaraðili farið fremur ósátt heim til sín í fylgd sambýlismanns, en heimilislæknir upplýstur um málalok. Bjóst hann þá til að meta hvort efni væru til að vista sóknaraðila á sjúkrahúsi gegn vilja hennar með leyfi dómsmálaráðuneytisins.

Varðandi innlögnina þá hafi sóknaraðili komið í hádeginu 11. þ.m. til innlagnar á geðdeildina og hafi heimilislæknir hennar, Pétur Pétursson, fylgt henni. Sjúkdómseinkennin hafi verið þau sömu og daginn áður og sjúkdómsinnsæi ekkert. Af hálfu lækna geðdeildar FSA hafi innlögnin verið samþykkt í trausti þess að leitað yrði leyfis fyrir nauðungarvistun m.a. til að unnt yrði að koma við nauðsynlegri lyfjameðferð. Meðan leyfis var beðið hafi ekki verið reynt að gefa sóknaraðila lyf, enda hafi hún ekki talið sig þurfa á þeim að halda.

Eftir viðtal fulltrúa Ráðgjafadeildar Akureyrarbæjar við sóknaraðila að morgni 12. þ.m. hafi af hálfu Ráðgjafadeildar verið sótt um leyfi dómsmálaráðuneytis til vistunar á sóknaraðila á sjúkrahúsi gegn vilja hennar, með vísan til læknisvottorðs Péturs Péturssonar, dags. 11. þ.m., svo sem áður er rakið. Hafi leyfi ráðuneytisins borist í símríti til sjúkrahússins kl. 14.27 þann 12. þ.m. og yfirlæknirinn þá kynnt sóknaraðila hina nýju skilmála vistunar hennar á geðdeildinni laust fyrir kl. 15.30 og boðið henni að þiggja forðalyfjasprautu í vöðva (Trilafon Decanovat 1 ml), hafi hún þá mótmælt bæði nýjum vistunarskilmálum og lyfjagjöf, sem hún hafi fengið gegn vilja sínum um kl. 15.45 þann 12. þ.m.

Þar sem að hún hafi óskað að kæra bæði vistun og meðferð hafi henni strax verið hjálpað til að fá lögmann á vettvang til aðstoðar við kæru til Héraðsdóms Norðurlands eystra.

Að kvöldi 12. og 13. þ.m. hafi sóknaraðilinn kosið fremur að taka ráðlögð lyf í töflumformi en sprautu. Eftir nauðungarlyfjagjöfina hafi hún verið fremur róleg í sínum hugarheimi á geðdeildinni. Hafi hún þó látið í ljós reiði í garð starfsfólks deildarinnar og náninna aðstandenda. Sé hún enn haldin miklum hugsanatrufunum og hafi tilhneigingu til að ganga klæðalaus um, sem þurfi endurtekið að leiðrétta.

Í álitni yfirlæknisins segir að að hans mati þarfnist sóknaraðili nauðsynlega áframhaldandi vistunar og meðferðar á geðdeild FSA. Gefa þurfi henni aðra forðalyfjasprouu að 2 vikum liðnum, eftir það yrði hún líklega fljótlega fær um brautskráningu af sjúkrahúsinu heim til sín miðað við fyrri reynslu. Hún þarfnist síðan áfram langvarandi lyfjameðferðar til að hindra endurtekin veikindi af því tagi sem hafi leitt til innlagnar nú, en skortur á sjúkdómsinsæi af hennar hálfu hafi hingað til hindrað samfellda meðferð.

Hér fyrir dómi kvaðst sóknaraðili, aðspurð af dómara, vera alheilbrigð og í þinghaldinu 14. þ.m. hélt hún fast við kröfuna að hrundið yrði samþykki dóms- og kirkjumálaráðuneytisins um nauðungarvistun og þvingaða lyfjagjöf.

Rakti hún í stórum dráttum samskipti sín við lækna og starfsfólk geðdeildar FSA, sem hún sagði alla vera óháfa og hygðist kæra sérstaklega vegna afskipta af málefnum hennar. Kvaðst hún eiga tvö börn hér á jörð og þrjú fyrir handan sem hún væri í sambandi við í gegnum miðla og spákonur.

Í þinghaldinu í gær þá var sóknaraðili tilbúin að dveljast inni á geðdeild á eigin forsendum.

#### *Álit dómsins.*

Með vísan til þess sem að framan er rakið í vottorði Péturs Péturssonar heilsugæslulæknis á dskj. nr. 10 og athugasemda Sigmundar Sigfússonar yfirlæknis á dskj. nr. 14 og 15 telur dómurinn sannað að geðheilsu sóknaraðila sé þannig varið, með vísan til 2. og 3. mgr. 19. gr. lögræðislaga nr. 71/1997, að ekki sé tilefni til að fella úr gildi samþykki dóms- og kirkjumálaráðuneytisins 12. þ.m. um vistun sóknaraðila á sjúkrahúsi gegn vilja hennar og að hún hljóti viðeigandi lækni meðferð.

Póknun skipaðs talsmanns hennar, Sigurðar Eiríkssonar hdl., kr. 30.000 auk virðisaukaskatts greiðist úr ríkissjóði.

Úrskurð þennan kvað upp Ásgeir Pétur Ásgeirsson héraðsdómari.

#### Ú r s k u r ð a r o r ð :

Kröfu X um að fellt verði úr gildi samþykki dóms- og kirkjumálaráðuneytisins 12. þ.m. til meðferðar hennar á sjúkrahúsi vegna ástæðna er greinir í 2. mgr. 19. gr. lögræðislaga nr. 71/1997 er hafnað.